

**SAUNOAGA AUTU O LE TATALAINA ALOA'IA O LE FAUSIAINA
O LE OFISA/NOFOAGA E TOOMAGA I AI LE FALETUPE
TUTOTONU AUA FAALAVELAVE TUTUPU FAAFUASEI MA
MALA FAALENATURA I ULULOLOA
26 APERILA 2024**

**AFIOGA FIAME NAOMI MATA'AFI
PALEMIA**

FAAFEILOAI

**Lau Susuga i le Taitai o le Sauniga, Susuga Komisi Samuelu
Afioga i Minisita o le Kapeneta**

Taitaifono ma le Komiti Faatonu o le Faletupe Tutotonu

Fa'auluuluga o Matagaluega ma Faalapotopotoga a le Malo

Pule Sili o Faletupe o Fefaatauaiga

Pule Sili o le Kamupani o le APEX Solutions Ltd

Pule Sili o le Kamupani o le SUCON Consultancy Ltd

faapea le mamalu tauee o Samoa ua potopoto

O lea ua mapu i le tuasivi le fagotaga a le manusina, auā faiva o le Alii-seu o le Talalelei, e tusa ma le taulaga molia, auā so tatou va lelei ma le Tapa'au Sili i le lagi. Faafetai tele i lau susuga i le Faafeagaiga. Ia agalelei le Atua ma utupūpūina fulu o le segaula aua le feagai ai ma le valaauina.

Ae tau ia ina ou sāua le va, ona o Samoa o le Ao Mamala. Tulou tupua tausi o le afioaga nei, i Lepea ma Vaitagutu, e afio ai le Afioga i le Faumuina, o le Tupufia. Susū ai Usoalii ma Tāmāpaa. Susu i la’ua o Nofosā, Ai’i ma Vaitagutu. Alalatai le mamalu o le Tauaitu ma le saofaiga ma Atua.

O paia o lena e i aao o le To’afa o Igoamatua, o la latou fatuaiga tausi lea.

AUTU O LE ASO

O le auga o aute ma le faamoemoe autu o lenei aso, o le faailoa aloa’ia lea o le amatalia o galuega faatino i le fausiaina o le maota poo le nofoaga e tua i ai le ofisa autu a le Faletupe Tutotonu o loo i Apia. O lenei fale e faalagolago ma toomaga i ai le ofisa autu a le Faletupe Tutotonu i taimi o faalavelave faafuasei ma mala faalenatura.

E talitonu e le o toe po se silafia i le faatupulaia o mala faalenatura e pei o afa ma matagi malolosi, lologa, mafui’e, tsunami ma faamai tetele ona o le suiga o le tau ma le natura o le siosiomaga.

O le agaga la o lenei galuega, ina ia mafai ona fa’aaauau pea le faatinoga o auaunaga a le Faletupe Tutotonu i taimi e feagai ai ma nei luitau.

FAAMATALAGA O LE ATA O LE FALE

O lenei fale e tolu fogafale ma o le a fa’aaoga uma e le Faletupe Tutotonu mo le teumaluina o tupe, faapea masini ma galuega faatekonolosi, auā le puipuiga malu o faamaumauga ma

faamatalaga o galuega a le Faletupe Tutotonu faapea ai ma le nofoaga mo le afaigaluega o le a faatinoina nei vaega uma.

FAATUPEINA

O lenei galuega o le a faatupeina lava e le Faletupe Tutotonu mai i lana Tala Faatatau o le Tupe, i le tau e tusa ma le \$31 miliona. Ma, e fuafua e fausiaina lenei fale i le umi e tusa ma le 20 masina.

KAMUPANI O LE A FAUSIAINA LE FALE

O lenei galuega o le a fausia e le kamupani o le Apex Solutions Ltd, i le mae'a ai o iloiloga o faiga fa'atauofa a le Malo (Tenders Board Procurement Process)

PULEGA E VAAIA MA FAATONUTONU LE GALUEGA

O le ata o lenei galuega sa tusia e le kamupani a le SUCON Consultancy Ltd. O latou foi lea o le a gafa ma le va'ava'aia ma mātaitu lelei le faatinoina o le galuega, e tusa ma aiaiga, seia oo ina mae'a lelei ma atoatoa ma tuuina mai i le Faletupe Tutotonu mo le fa'aaogaina.

FAAFETAI

E momoli le faafetai i le Komiti Faatonu ma le Pulega a le Faletupe Tutotonu o Samoa, mo le finau maua'i e faatino lenei galuega tele ma le taua. O se galuega e aoga, e le gata mo le faatinoga o galuega fa'aauau a le Faletupe Tutotonu, ae mo le aotelega o fuafuaga a le Malo.

UPU FAAIU

O le tatalo ia agalelei le Atua. Ia uli ma sao le amataina faapea le faatinoga o lenei galuega seia mae'a atoatoa. E talitonu ua faatasi mai lo tatou Matai Sili i lo tatou faamoemoe, e pei ona tomatauina ai i tatou e le Susuga i le Faafeagaiga.

Ia alofagia e le Atua fuafuaga o totoe o lenei aso.

Soifua ma ia manuia.